

08 MAY 1997

MAHATHIR SELAMAT TIBA DARI LAWATAN KE AFRIKA

KUALA LUMPUR, 8 Mei (Bernama) -- Datuk Seri Dr Mahathir Mohamad selamat tiba di Lapangan Terbang Sultan Abdul Aziz Shah, Subang tengah hari ini dari lawatan seminggu ke tiga negara Afrika.

Perdana Menteri melakukan lawatan ke Republik Malawi, Botswana dan Afrika Selatan untuk mengeratkan lagi hubungan dua hala khususnya antara sektor swasta.

Antara yang berada di lapangan terbang untuk menyambut ketibaan Dr Mahathir ialah Timbalan Perdana Menteri Datuk Seri Anwar Ibrahim dan beberapa menteri kabinet serta bakal Menteri Besar Selangor Datuk Abu Hassan Omar.

Di Malawi, lawatan Dr Mahathir, yang disertai ahli-ahli perniagaan Malaysia, mengasaskan satu era baru bagi kerjasama perniagaan antara sektor swasta kedua-dua negara dengan termeterainya perjanjian membina lebuhraya dan meningkatkan taraf jalan-jalan yang ada.

Di Botswana, delegasi perniagaan yang mengiringi Dr Mahathir mendapat kesempatan menerokai kemungkinan mengadakan usahasama dengan rakan tempatan mereka.

Dr Mahathir juga menyertai Dialog Selatan Afrika yang berlangsung di Kasane dengan memberi ucapan khas kepada 12 pemimpin Afrika.

Di Afrika Selatan, Dr Mahathir menerima anugerah tertinggi negara itu atas sumbangan beliau terhadap pembangunan negara tersebut. -- BERNAMA

AH AKD